

**Aalisarnermik piniarnermik nunalerinermillu inuussutissarsiutillit
inuussutissarsiornerannik siuarsaaneq pillugu Inatsisartut peqqussutissaattut
siunnersuummut**

allannguutissatut siunnersuut.

Inatsisartut Aalisarnermut, Piniarnermut Nunalerinermullu Ataatsimiititaliaata
peqqussutissatut siunnersuutip pingajussaaneerlugu suliarinissaanut saqqummiussaa.

Siunnersuutip taaguutaanut tunngatillugu

**1. Siunnersuutip taaguutaa ima oqaasertalerneqassaaq:
"Uunga siunnersuut: Aalisarnermik piniarnermillu inuussutissarsiutillit
inuussutissarsiornerannik siuarsaaneq pillugu Inatsisartut peqqussutissaattut
siunnersuut nr. xx 2006-imeersoq."**

§ 1-imut

2. § 1 ima oqaasertalerneqassaaq:
" § 1. Inatsisartut peqqussutiliaatigut siunertarineqartoq tassa aalisarnermik
piniarnermillu inuussutissarsiutit naammassiviulluartartut unammillersinnaasullu
siunissaq ungasinnerusoq isigalugu suliffissaqartitsisinnaasut siuasarnissaat
suliniutitigut ungasinnerusoq isigalugu inooqatigiit aningaasarsiornerannut
iluqaataasinnaasutigut.
Imm. 2. Kapitalini 2-mi 3-milu oqaatigineqartut inuit ingerlatseqatigiilluunniit
Kalaallit Nunaanni aalisarnermik piniarnermillu ingerlatsisinnaatitaasut
inuussutissarsiorneq siuarsarniarlugu Naalakkersuisut inuussutissarsiutit
siuarsarniarlugit taarsigassasitillugilluunniit tapiiffigisinnaavaat."

§ 3-mut

3. § 3, imm. 2, peerneqassaaq.

§ 4-mut

4. § 4, imm. 1, nr. 4, ima oqaasertalerneqassaaq:

"4) Takuneqarsinnaappat akuersissummik tunineqarnermut, aalisarnissamik akuerineqarnermut, aalisagartassinneqarnermut pisortanillu akuersissutitut allanut aallartinniakkanullu pisortanit akuersinissamut nalunaarneqarsimasoq peqqussut manna malillugu inuussutissarsiutinik siuarsaanissamut atatillugu taarsigassarsisitsisoqarsinnaavoq."

5. § 4, imm. 4, ima oqaasertalerneqassaaq:

"Imm. 4. Qinnuteqartoq angallamut ataatsimut taamaallaat inuussutissarsiut siuarsarniarlugu taarsigassarsisitsisoqarsinnaavoq. Tamanna atuupportaaq inuk taanna ingerlatseqatigiiffinnik ilivitsumik ilaannakuusumilluunniit arlalinnik piginnittuuppat."

§ 5-imut

6. § 5, imm. 1, ima oqaasertalerneqassaaq:

"Inuussutissarsiutigalugu nutaamik sanaamik umiatsiaararsiniarnermut Naalakkersuisut tapiisinnaapput inuussutissarsiutigalugu umiatsiaararsiasaq minnerpaamik isikkanik 16-inik annerpaamillu isikkanik 19-inik takissuseqarpat aammalu Kalaallit Nunaanni inuussutissarsiutigalugu umiatsiaarassatut akuerisaasimappat."

§ 7 sioqqullugu qulequttap ataani qulequtaqqamut aamma § 7-imut

7. § 7 sioqqullugu ulequttap ataani qulequtaaraq aamma § 7, peerneqassapput.

Kapitali 4

8. Kapitali 4 peerneqassaaq.

§ 21-imut

9. § 21, imm. 3, peerneqassaaq.

§ 22-imut

10. § 22, imm. 3, ima oqaasertalerneqassaaq:

"Imm. 3. § 8, imm. 1 malillugu inuussutissarsiutit siuarsarniarlugit taarsigassarsisitsinermi nammineq aningaasaliissutit ilaqarsinnaapput pigisanik nalilinnik pissarsiariniakkap tamarmi nalinganut ilaasunik."

§ 23-imut

11. § 23, *imm. 2-miit 5-imut*, peerneqassapput.

§ 24-imut

12. § 24, *imm. 1*, ima oqaasertalerneqassaaq:

" Inuussutissarsiutit siuarsarniarlugit taarsigassarsiat aalisariummi inuussutissarsiut siuarsarniarlugu taarsigassarsiaqarfiusimasumi qularnaveeqquserneqartassapput. Qularnaveeqqut sapinngisamik pitsaanerpaamik prioriteteqartinneqassaaq."

§ 31-imut

13. § 31, *nr. 5 aamma 6*, peerneqassapput.

§ 32-imut

14. § 32, *imm. 2*, peerneqassaaq.

Siunnersuummut nassuiaatit

Nalinginnaasumik nassuiaatit

Nunalerinermik inuussutissarsiutilinnut inuussutissarsiummut siursaasarneq pillugu aalajangersakkat peqqussutissatut siunnersuummi peerneqassammata allannguutissatut siunnersuutip siullermik kingunerissavaa. Pineqartumi nunalerinermut tapiissutinut tunngasut iluarsaanneqarnissaasa tu-ngaanut aalisarnermut, piniarnermut nunalerinermullu tapiissuteqartarneq pillugu inatsisartut peqqussutaat atorlugu tamatuma kingorna nunalerinerup inuussutissarsiutit siursaavigineqartarnera maleruagassiorneqaannarallartassaaq.

Aappassaatut umiatsiaaqqanik inuussutissarsiornermi atugassanik nutaatut sanaanut atavissumik motorilinnut tapiisoqarsinnaalerneru allannguutissatut siunnersuutip kingunerissavaa. Peqqussutissatut siunnersuutaqqaartumi inuussutissarsiutigalugu umiatsiaaqqanut nutaatut sanaanut ikkuttakkamik aquuterallinnut pisinermi tapiissutit taamaallaat tunniunneqarsinnaapput.

Allannguutissatut siunnersuutip tunngavigisaanut tunngatillugu Inatsisartut Aalisarnermut, Piniarnermut Nunalerinermullu Ataatsimiititaliaata peqqussutissatut siunnersuutip aappassaaneerqarnerani isumaliutissiissutaa innersuussutigineqassaaq.

Aalajangersakkanut ataasiakkaanut nassuiaatit

Nr. 1-imiit 5-imut

Nunalerinermik inuussutissarsiummut inuussutissarsiutitut siuarsaanerup peqqussutissatut siunnersuummit peerneqarnissaa allannguutitut siunnersuutit kingunerissavaat. Aalisarnermut, piniarnermut nunalerinermullu tapiissuteqartarneq pillugu inatsisartut peqqussutaat nr. 10 12. november 2001-imeersoq nunalerineq eqqarsaatigalugu atuutiinnassaaq.

Nr. 6-imut

Inuussutissarsiutitut umiatsiaaraq atavissumik motoreqarnersoq ikkuttakkamilluunniit aquuteralaqarnersoq apeqqutaatinnagu inuussutissarsiutitut umiatsiaaqqap nutaamik sanaap pissarsiarineqarneranut Naalakkersuisut tapiisinnaanerat allannguutitut siunnersuutip kingunerissavaa. Ikkutakkamik aquuteralaqarnissamik peqqussutaqqaartukkut piumasaqaat taamaalilluni peerneqarpoq.

Nr. 7-imiit 14-mut

Nr. 1-imiit 5-imut nassuiaatit innersuussutigineqassapput.